



刻孫齊之先生松韻堂集

海虞 孫七政 著

卷七

詠雪

霏微集簾幕歷亂沾衣襟漸變青山色遂成瓊樹林
江梅應斂影郢曲自抽琴誰識閉門者長懷白雪心
病中述懷

白頭騷屑黯銷魂家破空餘手內尊身外浮雲真浪
跡眼前春色卽桃源寒流寂寂穿花徑夜月溶溶照

華門今日始馴麋鹿性但知芳艸遍乾坤

二

驚見池塘艸色新病懷幽思日相親無涯夢幻人間
累絕壑煙霞世外春鼎內黃金終換骨匣中青鏡未
埋塵阮生何必窮途慟洞口桃花不誤人

夢中作

花發猿啼嶂人家碧樹叢只疑霞外賞春色在壺中

咏夢

一結桃源想雲山意卽賒始知塵夢遠春色總無涯

喜馮山人子潛過訪因至禹錫山庄卽事

故人相別喜相逢投榻黃昏意自濃秉燭論心青眼
對呼童貰酒白雲重春雷乍發驚山魅花雨初番起
澗龍日夕風光催勝事扁舟江上且從容

天台萬歲藤詩贈阮步兵

昔在千歲上仙人曾持青竹杖或爲神龍或匿形變
化莫測幽姿精螫作天台石上藤帝錫嘉祉萬歲名
備經十帝反掌事委曲兩都翻覆情因知濁世真畏
途何當杖此跼踖行惟有天台採芝叟阮郎曾住仙

家久嶺上雲霞無日無代裏風波未曾有以茲結夢
通山僧願剪蒼玉隨仙霧不學漢家霧壽賜不逐葛
陂風雨冥山僧攜來蒼霧生蛟龍鱗甲金石聲仙翁
仗此壽無極佇看白日生羽翼朝驚蒼龍瞰八荒莫
宿雲根鍊精魄春風已到山中宅萬樹桃花開石壁
微聞天路松濤聲不見空山有人跡此中試杖仙翁
行冷然萬籟都空寂石梁一度總悠悠回視人間淚
沾臆信哉神物非偶然佩之難老通仙籍請君誦我
昇天行步兵豈復窮途客

瑞花歌

有序

余家藥欄內有紫木芍藥數本歲壬午忽發兩岐
者二枝歲甲申復發兩岐者一枝今茲乙酉乃發
竝蒂一枝枝不作岐微放時猶作兩花稍放便相
讓合成一帶其花側出翻作四照真如比翼奇甚
而心溢作鳳尾特異常年八十老翁咸詫此花之
瑞遂作小引繫之歌詩以備采摭云

瑞花者托根玄庭不殊謝家蘭玉之畔命名紫丹
卽是省中紅藥之別昔在壬午甲申一枝而分棲

鳳尾茲當暮春三月竝蒂而交瑣蛾眉香濃露下
暗識同心花動風前不分雙影蓋刺繡瑞氣而吐
作連珠剪刻混元而呈爲合璧信化工之極巧花
神之巨麗也若夫魏紫姚黃麗而不奇九衢四照
奇而非瑞况復種魁羣卉色倩紫薇無端幻出優
鉢難逢有意疊來瓊花未變考之農經花譜則未
覩詢之故老者舊而不聞乃若朝廷郊藪之瑞則
麟逢鳳巢軼生莫長而治在天下四國九域之祥
則朱艸霧芝嘉禾岐麥而本在王家故茲雖一花
之珍莫匪重華之應爲喜艸野亦被耿光遂作歌
二章上以備逸史誦德之采下以祈美人瑤華之
贈

其一章曰

九天兮膏露浹帝德兮重華洽艸木之花兮卿雲燁
卿雲燁兮珠連璧合帝之德兮被羣芬兆嘉禾兮瑞
紛紜亦布陽和兮寒谷春

其二章曰

我所思今天一涯欲採全心兮將寄誰芳艸兮信徽

瓊佩兮已齊美人兮但結全心期不嫌道遠兮長相思

又爲歌與張孫二翁

檜谷
三峰

君不見洛陽名花千萬種特傳魏紫姚黃奇紛紛共
逐春風散空令洛水愁臙脂又不見山經四照開迷
穀碧海丹山誰致之曾是謝家蘭玉畔當階紅藥翻
仙姿已見三花秀兩岐復看竝蒂分雙藹國色何當
連袂來天香復染同心衣只疑卿雲天上度誤拂連
理庭中枝優曇無色芝無種借問天工何自貽八十

老翁爭相詫花譜農經總未窺我見奇花益難老君
家奕世禎祥滋合璧連珠在枝葉光風膏露由心期
心期中有霧葩微年年歲歲懷芳菲君其采采莫相
違主人拜獻萬年觴敬佩徽音永不遺願言人瑞同
花瑞長見花枝芳酒卮

又爲歌曰

大塊有文章真機塞寰宇雲霞變態艸木姿燦然天
工不言語何當剪刻萬古花春風作剪今偏賒每逢
虞仲山頭春艸遍子游闕里霧花燦露勻却發全心

香風動不教雙影散無言天長鳳凰枝分明花吐卿
雲爛天若有情誰爲開花若無情誰爲現應是重華
天子重華瑞山中亦許巢由見

又先作一歌效韓體示兒輩

嘗聞聖王之世麥兩岐嘉禾公旦誇隆姬百穀乃是
萬花基太和所集宇宙希木爲連理傳亦詫未聞奇
花合沓開瑤枝歲昔壬午初發奇紫丹兩穎分雙蘂
亭亭四花似連珠芬芳燦發優曇姿去歲甲申花更
肥一枝兩岐徑尺圍今年乙酉不作岐兩花竝蒂連

修眉黃心特抽紫鳳尾其花四照若繡絺不惟花瑞
種亦變自顧涼德來天禧況茲木藥稱花魁百卉安
敢攀援之自今姚魏且却掃縱有瓊花安足希且昔
壬子先隴西異本全蓋曾產芝去秋老杏突芝秀狀
若夏雲夾赤曦天竹枝頭亦獻瑞白花變作紅杏嘻
紛紛籍籍耀庭池一奇未已又一奇舉杯酌酒謝花
神吾家種德積歲時種瓜紀夢已綿歷五世之間夏
陰培豈若曾孫朽木質無補人世空生爲此花之發
定非偶庶有華實光本枝須知人爵不足華道德爲

麗方男兒膏露光風在寸田此中霽葩實芳菲卷之
根抵不盈握舒之光耀燭紫薇結葉連枝非艸木星
榆月桂相參差舉杯酌酒再謝花種花種德同繁滋
上帝之鑒信不爽願花變作屈軼堯廷宜

贈別傅潛陽北上

仙詔迢迢下帝閣仙旌此日去吳門夏雲停蓋攀征
騎春柳垂絲挽別轅傳說無心通夢寐商宗有意潤
乾坤王孫相送欲何贈惟有芳芬澤畔蓀

贈汝師趙太史北上

江臯舉芳蓀天矯躡靈嶠玄覽周八荒遐探極幽眇
乾坤雖茫茫哲人握其要顧瞻我東吳東吳孰基肇
天欲開人文分周錫神奧歷代鬱嘉風菁華日宣耀
菁華信云宣巨麗亦已妙譬奏韶氏音伯牙擅高操
譬作商家羹惟說始和調叔季或頽風 皇家振洪
造英哲接踵生將相比肩召憑高試騁望夾日丹霞
照維皇覺羣蒙自我東南徼有美復膺 命旌節就
周道佇看翔鳳儀千仞蔚丹藻此去侍 君王治安
致清廟何以贈瑤琨爲君金錯報願言前哲規永在

君懷抱

阻雨寄趙汝師

故人一尊酒欲送宦游子宦游何迢迢帝鄉碧雲裏
朝發胥江隈暮宿梁谿汜怨此岐路風美人隔烟水
綠楊空飄飄芳艸何藿靡咫尺邈山河寸心不能已
竚立遙相思相思日千里

題顧漢陵清秘館

啜茗對佳境蕭蕭竹樹新已忘蘭是室還意玉爲人
圖史漫成癖禽魚覺自親看君會心處塵世得清真

贈方士梧楊子

清晝梧陰碧如水逸人小隱幽溪裏有時閒試青囊
術龍法還能問天子

題王侍御石沙公報功祠

丹徼風裁迴自持五湖重建報功祠甌雲越樹三千
里不及悠悠去後思

贈盛泰父時泰父自北訪張司馬岵嶽公歸

風塵匹馬事橫行不似諸生老一經祇爲交情輕朔
虜曾將俠骨借西京閒開竹葉畱人醉笑指榴花刺

孫齊之松音堂集
眼明更羨楚萊能戲彩相歡菽水是平生

送馮孟陽訪沈山人於四明却爲燕關之行

憐君楚楚不得志千里辛勤訪故交多少侯門君自薄獨懷高隱破江濤

二

片帆東下子陵灘夏逐秋風易水寒此去莫嫌交態冷休文詩句滿長安

闔閭城懷古

落日吳王國西風范蠡舟不見浣紗子煙波空自愁

秋夜禪房對月有感因懷陳將軍雪堂

解道長安好長安倍自憐舊時淮水月空向客愁懸心斷青門路身依白社蓮爲君窺幻跡人世益茫然

邂逅吳子允兆梅子禹金二姚君伯道叔度喜

甚遂命酌松下撫琴列子御風諸操因賦得

松下琴以贈之同與則莫君公遠郭君次甫

吳君翁晉梅君季豹陸君纂甫趙張二君幼

安去華

何當見逸調松下徽冰絃一奏別黃鵠載彈求列仙

關山既綿邈身世亦冷然始信曲中雅枯桐枝上傳
和鄔汝翼詠殘月如新月為徐茂吳美人

桂輪既已缺莫羨亦已萎夏長夜何永遠山出殘輝
殘輝良皎皎入戶窺羅帷雖映東北墀亦復如蛾眉
不傷直弦下但記破鏡期殷勤下階拜復怨明星稀
祇為君歸遲翻使妾心疑

與諸彥集雨花臺得十三元

秋色日千里中林滿芳蓀況我同聲彥風期暗相敦
攜此麋鹿性扣彼公蘿門高臺有佳麗躡屐窺雲根
花雨滅空色葉響淒荒原江山發莫靄清輝媚嬋媛
芳聲起織曲逸韻促行尊情來易紆鬱理勝謝煩寃
卽物雖負俗澹慮懷微言願言丘中賞比德璵與璠

諸彥姓字

新安王十嶽 焦山郭次甫 京口鄔汝翼

閩中馬從甫 宣城梅季豹 禹金

吳興吳允兆 姚伯道 叔度

吳興吳翁晉 新安謝少廉 少白

新安方嗣宗 劉繼泉 項九川

新安潘景升

義興俞公臨

寧國許心陽

梁谿王元方

洞庭陸纂甫

雲間張去華

吾家父子

逸客許琴師

何雪漁

美人楊六姬

徐翩翩

林兒得八庚

竹箭美東南遊俠饒西京出門見秋色登高集羣英
江山結空翠雲物增淒清詎云窺素德差欲薄華情
沉爾聞玄言雲霧忽以晶

郭次甫得十一真

秋日流爽氣涼風起蕭辰君子惜離居四達來相親
登臺飛羽觴逸韻絕無倫佳人復在茲宛然桃花春
落景不易停感昔良苦辛游目一江水頓足六代人
旣美榮與壯不慚老與貧各各吐芬芳情勝詎可陳
梅禹金得十三寒

耆舊畱堪數風流會獨難但從新几杖猶攝偉衣冠
名理千秋擅年光六代看蒼茫思不極落日一江寒

二

白社開初地青林覓舊壇霧葩常作雨落木乍知寒

問渡花中檝移庖竹裏盤百年長健在行樂好多端
三

清尊餘戀晚翠袖薄生寒腓艸猶堪藉幽蘭且一彈
盟應憑海嶽羣不入鷓鴣夏此人天裏同依佛日歡
吳駕部泳瀾招飲冶城山樓燭下分得明字兼

別吳季

秋日竹林讌風流有部兵 帝城飛葉下仙閣望雲
生白壁投非暗干將夜自明獨憐歌曲盡分手別西
京

江上書懷因懷白門諸社友

不分頭俱白偏教數獨奇始知京洛道空負武陵期
瑤艸未應晚丹經早自窺攜家白雲去泉石好棲遲

二

四海多相訊孤心獨自搖秋分白門道夜渡廣陵潮
木葉愁邊下年光客裏消歸來有松菊三徑日蕭條

贈新安王太古

吳江楓落句堪驚斗酒壚頭且共傾多少風流眼中
客獨憐年少慰平生

送太虛子北上

少壯亦秉志老大苦不休才下不偶命矻矻空白頭
今我師門彥翱翔入皇州臨岐一握手悵爾聊淹
畱之子川岳秀服膺在千秋不滿六尺軀三界兼羅
收雅志局四海匪曰煙霞流而爲名教出所造益以
適時清四陲晏廟堂蓄先憂嘉猷自之子緩步宜相
投志業有常度語默無定謀願言順時命各使生平
酬緬懷衆芳落內顧俛生愁匪爲岐路惻悽此周道
由去去白雲遠三徑還相求

與吳允兆兒輩探西礪坐石相待

秋深霽益好古礪積苔色雖無飛泉聲林疎露石壁
日夕披莽至苦無歸鳥翼孤彼獨往興松濤坐虛寂
片月峰半來清影若相匹

與吳允兆翫月山中因懷沈山人嘉則

山中月自佳露氣襍虛靄桂馥流暗芳雲漢濕光彩
清景若懷人衡門可瀟灑因思鹿皮翁秋溪滯江海

何將軍賣劍行

名良臣

君不見將軍有寶劍云是昆吾刀將軍與之生歿交

陣上功名何足多牀頭意氣干九霄精光白日不相
匿浮雲橫決秋空高自言男兒當年不能牖下歿生
當名世心不已報國須教萬里空借客西京詎相齒
何當空負國士奇精誠貫日無人知寶劍寧嫌鐵光
蝕壯心豈俟河清時生平足跡半天下平原已歿誰
可依不如賣却腰下劍且與酒人俠客相招攜吁嗟
將軍酒人乎悲歌慷慨心相期寸心若使坐相照干
將可折萬事微孫生聞此意慘感恨無黃金爲君擲
君今東謁弇州翁片言却重鼎與鐘朝中愛上趙大
夫高風不下蛾眉峰試令緩頰見二公干將不歿干
古雄

贈徐松陵

末調牽卑風乾坤闕嘉氣不有大雅作王風孰昭矚
上德垂衣理良牧彈琴治匪徒抱淳樸人文蔚精意
聖明續千古本希曠華世陶養二百年距乏聲與利
叔季訛澆漓操刀不能制大國靡烹鮮文治日彫弊
卓爾偉長氏胸中孕精異泱泱中州風遊刃愜餘地
襟期屬雲霄菁華燭魑魅澹蕩煙波邑情隨白鷗寄

江東文獻區譬海饒珠貝風流苟莫宗長裾豈輕曳
緬彼二三子家家匿珍秘爲君各吐露心醉匪文秬
粵予逃虛人心跡兩蕪翳亦懼良覲艱瀕行謁旌旆
目擊雖道存深心卽辭寓正值清明時鸞凰定天際
冀君崇雅道巖穴被光賁持此區區懷聊以代瓊佩
送戚少保東還蓬萊

旌節還家自渡瀘黃金解印聽吳歛欲酬衛霍摠忠
略翻向喬松隱壯圖青海至今無號箭炎方何必謗
明珠但畱昔日丹心在早晚 君王賜虎符

又贈戚少保

南北登壇百戰功只今回首陣雲空惟餘一片報恩
意不使干將笑匣中

二

夜飲弇山百尺樓酒酣微笑看吳鈞平生不賣盧龍
塞白首邊庭未拜侯

三

征胡幾度急飛書白艸黃沙血染餘一日功成思學
道蓬萊山上結茅廬

四

折盡雄心鍊九陽
思將雲壑換沙場
畱侯欲向赤松去
只恐溪心負漢王

五

汲孺孤高重漢京
蓬蒿亦自有狂生
君今欲問江東士
長揖將軍是子荆

哭阮將軍華山

大樹依然是蕭齋
人已非蠹書空舊迹
虎帳寂寒輝
白首交何在
春風花自飛
傷心爭席處
酌酒泣沾衣

題畫

江南杏花時
風簾掠雙燕
歸落梁上泥
猶帶飛花片
病中汪司馬伯玉見過敬酬短章

碧山松竹好蕭疎
誰信窮愁懶著書
忽訝占星傳太史
不嫌排藿到荒廬
花前媿乏野人饌
門外空淹長者車
一向枚乘聞妙發
却教貧病恍然除

與龍司理君善論文舟次并送還楚中

美人才望籍明廷
暫越江湖駐短亭
波上論文邀水鏡
花間吐玉借幽馨
潘郎莫自愁多拙
漁父由來忌

獨醒此去楚蘭方可媚君王瓊佩在寒汀

同徐司理茂吳登昭明讀書臺得十一真

翠微初霽夕陽新
梁日荒臺尚未湮
秀色但餘書帶
艸虛濤若有誦絃人
王喬嶺上何時返
虞仲山中幾
度春莫向雲溪招
帝子秣陵遺事不堪論

傷葉茂長

憶昨歲寒時逢君
松陵頭殷勤斗酒間
慷慨志前修
謂予詩清新頗似韋
蘇州是時霜已嚴
震澤寒雲浮
思得鱸魚膾衝寒
網清流同集俱賢豪
夏愛沈隱侯

意氣在千古寧惜披羊裘
粵予復多病羨君壯不侔
須臾過梁谿仍前恣遨遊
此興謂可常孰能抱前憂
詎意六月間一別卽千秋
昨日聞君病吳王城畔愁
今日夏聞君惻愴臨終謀
使我黯無言揮涕不可收
夏進生前酒君魂亦知不
君生旣多艱歿後名亦留
浩蕩一生志總向遺文求
縱垂身後名人琴竟悠悠
益歎人生世真若波面漚
生前不痛飲彫謝徒山丘
玉鹿仙丘篇爲顧玄言甫壽

昔見採真子五嶽事
霧仙今看逍遙士
一壑棲雲煙

適意投遠跡象心恣冥筌剪徑閱幽賞息關謝塵牽

二

塵牽無停機哲人止玄鑒靜室撫虛白迅流如泛濫
止足柱下徵玄同漆園驗四域馳聲華一真守恬澹

三

恬澹本忘懷真宗默云契仙道乃不遐寤寐授霧秘
會見朱艸生豈使霧膏闕珠鶴煙駕來玉鹿芝田至

四

嘗聞種玉者千歲顏色美復云麋鹿侶騰躍蓬萊汜

往往山海客挾此靡年紀願言永珍愛長嘯丹丘裏

五

丹丘何窈窕本是三神山鮮葩冬春耀青靄朝暮綠
春申霸迹晦老氏玄風閒祗許禽尚蹤遡洄以追攀

老子有三神山惠山其一也玉鹿仙丘在惠

山之麓本名黃歇澗

自桃源澗越嶺尋破龍源遂抵維摩寺投宿

幾回度幽澗始聽招提鐘古木寒溪殿蕭然住一峰
僧歸海月白客起山雲重旦暮此中趣但堪麋鹿蹤

夢中詩

并後序

軒紀推天製堯時布閏成卽今增甲子端爲節虛盈
問朔三年合窺元一氣平羲和方有道日月自重明
霧桂先教長仙莫却暗生亮因天統順萬曆永無傾
右萬曆丙戌秋孟十三早之四夏許夢與今天
子諸元宰殿上相議論命一題云一年有十四月
節氣詩蓋謂閏年也予夢中卽占句云曆用羲和
舊時因氣朔夏桂輪週復長莫莢遍還生首尾意
俱就未成時在張仲幼于曲水艸堂之冷然閣森
兒以送楊司理應 召入京亦在郡城至廿有三
日白露節夜分許以秋雨作寒不寐乃取夢中意
隱括成此卽秉燭考韻以停作平以永言曆作永
無傾次早試鄔汝翼墨書之槎兒侍側書竟黃伯
尚質黃仲崇雅授衣喜甚

贈楚中劉維茂

避客翛然臥艸萊白頭重見長卿才凌霄鸞鳳絃中
下出水芙蓉句裏開楚國但存和氏璧燕王終築郭
生臺何當搖落知音別相送江潭起暮哀

孫齊之松韻堂集
感遇和成處士

浮雲世事豈堪論四海誰酬借客恩俠烈不慚非劇
孟肝腸無復是平原惟逢猿鶴可青眼坐遠風波但
綠尊却笑咸陽頭易白長踞空自曳王門

爲沈仲壽王文父

鳳城迢遞白雲邊聞有王喬好學仙赤舄已從秦帝
授飛鳧還向漢時傳衣冠七貴曾先世蓬海三山不
記年却憶淮南叢桂發直將招隱寄新篇

汪司馬借劔行爲蘇季子爾宣贈

并序

新都蘇季子義俠士也少年爲不義憤思血讎一
人頭四顧錯愕噫嘻曰吾何從得寶劔乎當是時
乾坤雖廣隘不重足司馬汪長公聞其事卽脫干
金劔佩之讎卽震死蓋讎非歿劔歿司馬之高節
動四國四國壯士聞之盡裂背欲血讎也司馬之
劔術遠矣善乎十嶽王翁歌之曰俠節先聲讎自
斃何須不義血干將凜焉有國士風蓋去荆軻二
千年間而復有蘇季子汪司馬之事劔術益神予
故壯其語奇其事并爲歌之

英雄百年內常憤萬古間苦恨直節不得伸腰頭寶
劍空自懸寶劍七星牛斗文祗因俠烈故隨身若令
世有不平事從教萬丈龍光賁不見張雷無道風雙
飛泗水安能制東南霧異白嶽鍾氤氳盤薄司馬公
文章意氣總絕代片言許諾生雄風自憐說劍空奇
絕何如五步卽流血生平一劍天地知上酬國事下
狗奇五十未展封侯略三尺安用隨身爲朝聞壯士
冠髮指夜聽龍泉鳴不已急呼壯士來佩之四國聞
之盡裂皆英風折讎讎自斃古來俠烈少見此借言
此劍價何許若耶已閉湛盧去試將比却借劍心君
道雌雄更誰與噫嘻乎不獨司馬爲俠儒王翁白首
劍不疎不使不義血干將田光先生精未渝

重贈蘇君

蘇君俠氣本翩翩更有風流重可憐史篆斯分俱絕
品書成猶帶劍鋒懸

二

雨洗秋山正可親別君無那菊花新西歸爲語酒樓
長孫楚年來愁殺人

孫齊之松音堂集
僧房酒次贈別蘇爾宣

零雨蕭蕭被秋艸
憐君欲走長安道
不怨王孫歸去
遲恨却西風雁來蚤
臨岐媿乏黃金囊
江水悠悠別
意長誰道蘇生黑貂敝
猶能貰酒醉僧房

題畫史舒五嶽

韓幹畫馬能畫骨
周昉貌人獨貌神
從來物妙非象
合萬象總出胸中
真舒君綽約若處女
夙悟丹青似
神與頃刻天工筆
底生却笑楮葉三年成
愷之阿堵
真妙絕夏解輕雲籠
素月坐令颯颯生
神姿到處呼

童辨毫髮少年曾入楚王宮
楚王披襟貌雄風
前年復聘遼陽幕
將軍擬畫麒麟閣
頃來貌却孫季子
分明嘯向松風裏
變成華髮不似吾
畱得童顏翻自爾
舒君舒君真可憐
問君何自探其玄
解衣盤礴自神
解況向五嶽披雲煙
范寬却師造化手
伯牙山水非
絃間不然粉奩畫
筆千萬史古來曾得幾人傳

爲靜檜二張翁壽杏臺張翁

誰家仙臺下
陽月杏花妍
謂有逃虛客
曾將鴻烈傳
鍊形渾似鶴
覽鬢尚疑蟬
恬澹意偏適
和全迹漫牽

不違方內業別隱壺中天小雅元張仲長生擬倭佺
海籌初記日星曆古稀年桂是堦前樹芝爲洞裏田
鵬褰任霄漢鹿性自林泉果老莫投會紫陽朝降筵
憶君素交約期我赤文篇正此逢秋壑臨風共覈玄
七月十四日壽湖村時翁

中元節欲屆大雅甲初盈始識少微降還同上相生
傳家周孔業樂志羲皇情解得玄中意能藏柱下名
看雲遂真隱希世薄浮榮詩越黃初體琴調綠綺聲
碧霄輕鷲薦滄海狎鷗盟晚學長生術窮搜外史精
紫芝和露採仙醞對花傾秋日瑤池宴金風蓬島清
方催郤詵桂重拂田家荆大谷梨才熟安期棗已成
更教蕭臺曲爲擬鳳凰鳴共指遙空月年年此夜明

定情詩

始因孤憤繼以達觀命之曰定情云

終朝寒幽佩何事却多違舉世皆交喪深心空拭微
愍騷難反屈懷憤易同非剩取孤芳在芙蓉歲晚衣

二

一心空皓首百鍊總銷魂獨抱孤生恨誰希國士恩

荆軻惟有慟李廣竟何言悽斷長干柳年年挂白門
三

首陽終餓死魯叟亦栖遑自古天難問千秋道獨光
憫時寧不怨去國復何傷採採北山蕨煙霞正未央

四

本為皇風茂非關幻業沈龍雲真冒昧豹霧亦荒淫
總竭窮愁力誰明不朽心獨慚周柱史偏較百家深

五

自有長生術都因短計荒達觀何要妙老去始悲傷

壯志休看鏡浮榮任舉觴虛舟若可喻天地作行藏

六

大笑天公訣盈虛似月光罷兵緣失馬挾策總亡羊
夸父窮行跡楊朱泣路旁不思求象罔吾道日倉黃

七

元化復何始幽陽播物和扶桑方浩蕩月桂正婆娑
玄覽珠偏得多言寶益譌但能乘日養不借魯陽戈

八

太史多傷遇中郎却定情養痾忻自得觀化識無生

細艸春前碧寒梅雪際明惟應弄羌笛一曲海雲驚
感時

聞道中朝治無因說讜謀將軍奏凱樂宰相議封侯
山袞方無闕江筴好浪遊但蒙堯舜力長願作巢由

二

太平惟獻頌萬壽并謳吟夏切憂時略明君意獨深
祗防小雅廢莫恤四夷侵願指南山色長如北極心

夜坐

素月上寒碧松風來石床疎影泛蘿壁虛濤奔夜窻
却令三徑裏坐入廣陵江

贈楚府劉典籤子敦

賢王能設醴仙宰解辭郎帶礪忻臨楚池臺喜接梁
才流本公幹吏事復文房吉獨將詩諫舒惟挾禮匡
澤蘭常在握水藻盡成章興逐江山發情追屈宋長
猶憐世羔雁投分悉鸞皇況有階前玉分明斗畔光
方驚飛葉散旋寄蚤梅將願借王家醴和調好佐商
歲暮百穀王仲見過因往山椒探梅

彼此乾坤病裏身王孫憔悴各沾巾鄰家割宅供婚

孫齊之松韻堂集
嫁荒徑畱松待故人眼底浮雲俱幻態音中白雪自
陽春歲寒何處看交意惟有梅花不厭貧

刻孫齊之先生松韻堂集

刻孫齊之先生松韻堂集

海虞 孫七政 著

卷八

雪中接肖甫張大司馬書貺次日卽有歸田之
信

雪中緘信慰平生恍似尚書舊履聲世態備從貧賤
得高風獨使薜蘿驚丹心萬里今辭國白首空山但
有情漢道總云全盛日豈應機密負張衡

孫將軍招飲大石山房

海畔春陰結山家暮靄凝步兵畱醉處長嘯有孫登
汲石分先礪然爐借佛燈時平多勝事乘興卽攜朋
傷顧玄言
白首知音更幾人傷心忍見殯宮新重過把臂論文
處惟有楊花入坐裯

二

束髮艸玄秋復春愁看蕙帳網流塵山中猶有藏書
穴林下今無問字人

三

愛客頻開碧玉林綠尊偏醉舞衣深記教刻燭催詩
句回首風流淚滿襟

四

依然巖下掩柴關不復春風舞綠鬟莫怪花時偏灑
淚故人埋骨半青山

時葉山人茂長先公作

夏五拙值六十一生辰

已看刺眼榴花色更喜酡顏竹葉春人世幾迴初甲
子王孫今日又庚寅琴中自鬱青霞氣物外應閒白
社身若問長生何所似年年此夜月華新

燕山歌送成大北上

燕山五月驅馬疾燕山火雲密如織但知千里憶同心豈問炎蒸鑠金石燕山涼氣復蚤來八月九月枯桑摧滹沱河中冰不開黃金臺畔黃雲堆黃雲朝暮散復合七貴五侯紛雜沓朝傳漢帝招賢士莫說公孫開邸第漢家事業自無窮咫尺無媒豈自通試上黃金臺上望從來銷盡幾英雄英雄雖盡壯心在總入公綏坐嘯中

和沈山人弔李青蓮墓

墓在當塗之青山

一片青霞氣千秋俠骨淪只今江上月曾照謫仙人
湘水遙連楚浮雲總蔽秦空餘野花發猶似錦袍春

與陸山人

白首無家君莫哀採薇遷鼎總寒灰且畱一片冰心
在清夢山中雪後梅

新秋七夕後夜坐

多病乾坤裏新秋枕簟中涼風思促織疎月挂梧桐
爲想天孫意應憐夜色空殷勤訴瑤瑟清怨獨無窮
哭莫大廷韓

傳道知音失驚憐奈若何傷心日衰暮把臂又山阿
忽慟魂俱喪徐思淚更多從今屋梁月幾度泣幽蘿

二

每恨王猷棹空懷蕙帳春却登楊子宅不見艸玄人
昔日林中契今朝陌上塵大江徒自逝難盡客悲辛

三

俠烈生前意悽涼死後身空餘漳水贈猶自茂陵人
弔客徒來鶴高天已喪麟無書授門弟那慰白頭親

四

交道豈云盡心知自此微常深千古志奄奪百年輝
鄰笛聲猶是西川路已非相看泣成血何必李陵衣

哀慕詩贈華仲君

鬱鬱山有木殷殷山有雲杳杳雲山下悲哭何酸辛
借問爲誰悲結念軫慈親云我三公養不忍易昏晨
奈奉慈親命束髮事明君雖居承明廬夢繞北堂
人千里遠結綬三年泣沾巾色養不獲展志養庶或
伸豈慕捧檄義遂負嚙指恩重幃絕言笑拱木栖精
魂長辭宿昔愛徒哭空山墳一聞此語悲肝膽慙若

焚枯魚慟朽絕三釜哀生存風木豈不恨孝慕良已
惇昔賢有遺則此志君克循思覲令母範瞻此孝行
純

弔邵生

聞昔黔婁生餘貴常在身不屈以當榮不辱何羞貧
去彼數千載高風激斯人今君復何艱釜甑沐屢塵
惻愴一生內素業自討論周詩戒南陔孔志遡西麟
困頓只尺途用意實已勤如何彼蒼者茫昧不可陳
長貧旣與義短數復奪仁斃斃孤嫠業道路爲酸辛
人生亦何常通塞若轉輪在君豈不阨達節聖所親
不寵在世緣何辱辭世因但恨飲不足空負漉酒巾

寄憶嶺南歐水部楨伯

長憶能詩水部情一尊江上別西京青萍在握憐歐
冶白首臨岐怨子荆空谷病淹秋葉下故人書到曉
猿驚梅花若問相思夢夜夜羅浮片月明

戲詠秋海棠

一名斷腸花愴別時語也

非無海棠色不矜艷陽日非無素馨馥彩麗復如纈
孕美方一葩摘秀涉三節粉色散秋霞臙脂澹春雪

花態隨意妍天工一枝別歎此珍異姿騷經獨岑寂
徒借星槎名竟謝蓬萊闕偏結叢桂期好逐幽蓀列
雅艷若可餐芳氣恍堪掇宛似佳人來文心兩相密
心知歡莫逾故交情愈切一日生別離肝腸續還絕

二

非無春華色不矜艷陽日非無秋蘭馥彩麗特奇絕
粉萼懷紫房仙苞擢華纈雖有綺霞心青靄日相結
碧海度涼風蒼岬洗澄澈幽潭冽寒泉茲花媚鮮潔
宛若波上仙揚蛾步羅襪何必瓊樹枝可解長饑渴

題畫

春風岬岬柳絲斜愛殺澄湖萬頃賒不問桃花迷客
處豈知人世有仙家

二

萬里江山朔雪紛寒林微徑杳難分山僧欲到峰頭
寺猶有鐘聲度白雲

題採芝圖贈成山人霞樵

採芝復餐霞仙路方自遙誰知霞表客本是山中樵
贈譚者朱生

蓋世勳名總賢哲東陵却笑西山節試看千古英雄
人誰逃小史縱橫舌

冬日同浦君融訪安茂卿西林

誰識人間世霧區不染塵花藏疑誤晉山古似逃秦
水樹遙分影煙霞半繞身悠然問奇者今日見清真
過惠山弔顧玄言因登絕頂

過客潛然問幽躅依然巖磴青山麓寂寥舊日艸玄
人惟有梅花滿空谷空谷寒雲送客愁獨攜長嘯上
峰頭五湖千朶芙蓉秀欲學鳴夷弄碧流

雞鳴僧舍雪後詠懷贈趙太史

晚晴佳氣正葱蔥積雪遙看滿漢宮蕭寺寒光松徑
裏帝城殘照雁聲中客遊京洛幾人老山遶蓬萊萬
古今一自立春傳太史先教銀樹作芳叢

代湯省諫和韻答王師孟

省郎無事狎鷗盟西爽朝來挹帝城處世已知名是
累陶真不厭酒爲情風前玉樹含香皎天外芙蓉入
座清自愛王猷多逸興偏能刻燭詠金莖

題馬生蘊玉齋

孫承之林音室集
被褐遊世間柔情澹時俗誰知葆真子懷中蘊奇璞
短歌行爲徐飛卿贈

石頭冰高江水咽江干若理沙棠榭白門啞啞烏啼
切念君思斷青樓泣青樓一別天寥闊使妾肝腸空
自裂當場行樂卽雄傑安用腳踏苦騷屑賤妾爲君
招契密西京踏遍賢豪窟若个銷魂不投轄若个攜
詞不才絕興來擊節珊瑚折楚水吳山正飛雪自喜
芙蓉色方發那知碧艸芳俱歇玉壺酒清香乍冽萬
事人間等蠅蟻五侯七貴終銷滅君今不樂空怛
夜闌更盡鄰雞聒漫云海水添烏渴玉窻無情漸照
晰流蘇忍爲同心結心中情緒若可說白雪亦媚陽
春節

寄懷禹錫阿咸僑寓百花洲上

蕭然窮巷一茅廬却喜頻迴長者車避地不忘梅福
隱移家還傍伯通居春風洲上花猶發夜月門前柳
自疎若憶嗣宗長嘯處豈堪回首重踟躇

和友人觀營妓迎春兼呈沈明府

爭傳白傅催仙仗忽訝紅妝擁畫輪南國韶光元破

臘今年春色獨隨人花枝半入桃腮麗柳葉先舒翠
黛新總爲陽和曲中奏風流千載亦難湮

早春尋開元廢寺

廢殿何年寺閒從野徑尋空門封臘雪選木語春禽
佛挂鉢衣古香銷寶座深偏憐蕭瑟意更自遠禪心
贈少司馬王元美之任畱都

久薄勳名物外看幾經仙詔切朝端片雲隨意舒丹
岫孤鳳從霄下彩翰日月坐光新幕府風流還是舊
衣冠從今北極紆宵旰不獨江東倚謝安

二

河關百二拱皇圖爲借雍容鎮舊都謾道丹書殺玉
帳先從赤水問玄珠麒麟若畫應誰匹山斗看來絕
世無元老只今方叔在千秋寧數管夷吾

三

蓬山閩海自滔滔爭奈名高不易逃本爲家風舊司
馬也緣仙藏有兵殺人間歲月先成果世外三千未
熟桃且待漢庭名遂後赤松天路任相遭

又集張幼于宅送別得臺字

澤國春風萬里來紫薇旌節繞蘇臺徵書再起東山
臥送別同傾北海杯仲月煙光催麗思清時韜略屬
仙才王孫欲贈冰心去惟有一枝江上梅

聽鳥啼

一卷蕭齋雨數聲高樹禽關關不忍去似識幽人心

二

盡掃塵中慮忽來空外音此時楊子徑剩有落花溪

傷坤丘二開士

每愛禪棲竝春風幾度過傷心到門徑埋骨盡山阿

賣藥番多病掩關仍是魔益知無生旨老去好婆娑

和錢新昌詠杜鵑花

蜀帝山中魄何在越王臺畔花空繁休啼夜月沈芳
恨却倩春風剪淚痕幾許雕欄怨征戍一叢青嶂愁
王孫潘郎總愛河陽樹腸斷年年別故園

江行翫月書懷

旅泊蒹葭際凄清獨扣舷十年江上月重向客愁懸
桂影搖青嶼弦波射碧天不知三五夕明鏡爲誰圓

二

去國青山外行舟綠水潯月明秋漢迴潮度海雲深
書劔雙衰鬢平生萬古心天高不可問何處切霜砧
有所思

古云世路多嶮巇一生半被紅顏欺誰知老大厭經
歷却令感歎徒傷悲君不見世上紛紛市井兒朝爲
庸愚暮才傑等閒投合要路津一朝意氣生虹霓自
謂無才幸進身却笑才高湘水濱自謂逢時偏愜意
却笑玄經獨沉滯惟知捷徑取榮通誰念堅貞樂樵
悴前車旣覆後車去百歲曾無千歲慮古往今來總

一途大聖遭之亦自吁不美他家獵卿相惟悲身世
多憂障不美他家朝菌榮惟悲身後悠悠名伯兮自
向西山死跡兮自向東陵生一夷一跡兮雖殊致死
利死名兮復誰異失性空貽蒙叟譏太潔終爲道家
忌莫云進退無可依朝聞至道夕死宜大笑天公生
死訣掃却萬古情塵迷太行之阪能推車達人天地
爲籛廬孟門之水能覆舟達人濟汨皆安流高樹寒
蟬抱影滅不如蚯蚓從時屈鐘鼎非能駐歲華身意
由來會盈歇只將富貴等山阿豈信高華鑠金鐵自

古王侯不白頭何愁碧海蓬萊竭

爲倪公甫賦三貞詩

殉節旣不易赴義良復難矧茲溪閨媛完節古所歎
烈烈共姜操千載爲心酸如何一門內三貞若連環
兩卿旣下世遺胤藐然單哀哀提抱間奕世宗祧關
舍此儻不顧世德坐相捐卓哉三太君志行何潔鮮
保孤倡趙氏丁張狗高言三人聯一軀白首要芳年
死者如可作生者無媿顏昔日襁上兒今日寰中賢
相繼辭孤兒下報倪氏先上以明懿則下以激懦頑
春蘭與秋菊芬芳永無諼

遊霧谷寺禮寶誌公塔

久閱青蓮色重瞻白玉光

轉輪分世界淨業總栖遑
恒沙千仞變定宇一燈長

苑樹深畱藹林花曲度香
夏看佳氣鬱近接帝陵
旁

公出世于齊示寂于陳重瘞于 聖朝顏色

如生指甲輪遶

同郭山人王山人徐茂吳鄒彥吉梅禹金赴左
司馬王長公招集雨花臺得佳字

帝里秋光無遠近古臺幽徑落蒼崖王猷到處攜新
爽謝客招來散逸懷清磬出雲殘照迴疎松映月晚
煙霾多君坐嘯臨戎幕江左風流更自佳

分賦得邀笛步

憶昔關山片月新一聲羌笛思沾巾只今猶照青天
月何處還邀弄笛人

又賦得秦淮水

今古青山對綠洲獨遺亡國恨千秋多情惟有秦淮
水猶自西流向石頭

雨雪曲

年年朔雪度龍山銷盡春風萬古間一自梅花曲中
落幾人腸斷玉門關

二

江南氣煖百花紅肯信燕山雪滿空鴻雁不教傳塞
北鴛鴦空自織機中

送嚴仲拜中舍北上

江臯雪盡雁飛輕遙伴仙郎去玉京省闈風流今謝
眺相門經術舊玄成黃河水解迎青雀紫殿花開照

綺纓日侍 君王艸綸綍莫云金馬好逃名

贈別遊方士

學種芝田玉洞中多君年少憶虛空誰知白日丹難
轉自愛閒雲意不窮

二

臘月江梅望雪妍青樽未盡獨悽然今朝鶴徑辭千
里他日鸞霄別幾年

贈蔣翁

小隱在城郭蕭然遠世喧別開求羊逕常貯阮家樽

歲月壺中度煙霞物外論春風愛幽客臘日長芳蓀

擣衣曲

又近授衣節誰傳紫塞音強和今歲淚重拭去年砧
杵落齊紈冷悲纏漢壁深願隨孤夢寄何處是榆林

贈武林保叔寺僧超方方能言巖頭陀仙悅

湖光塔影落諸天別去空門又幾年一自遠公松下
偈却今回首獨泠然

二

松間活火自煎茶石鼎微濤泛碧芽爲說頭陀蛻仙

骨只宜方外老煙霞

次韻酬錢仲思弔王父西川公大石祠仲思於

王父爲外曾孫

石室藏書處春風弔古時林中仍帶艸砌裏益瑤枝
人似與公癖碑同羊祜祠百年悽惻意今日見題詩

詠橘

南服生嘉樹西園映玉除無心比孤竹有頌錫二閭
楚國秋芳日盧家夏熟餘願君采華實莫使瑤盤虛

哭周吏部敬翁老師

唐虞逝云邈賢聖杳難論舉俗貴干時馳騫競紛紜
匪無越俗操精深屬誰人夫子秉宏節滔蕩涵天真
昭心麗白日絢彩鬱卿雲雖懷秋霜介與物紆陽春
雖負經綸策端緒渺莫陳我欲 聖明皇上薄華與
勳此意豈輕用可使輦俗聞翩翩千仞上雅志固難
羣天心胡愛道奪此股肱臣泰階方正直豈乏濟時
珍誰知至德世求賢良苦辛元凱雖登進臯夔寧遽
淪忤彼龍蛇歲痛此鸞鳳屯蕭條念千載展轉徒殷
勤曩昔西京日水鏡甄人文良非國士姿過蒙拂埃

孫齊之松音堂集
塵問我何年歲骨肉意諄諄士爲知己死矧茲恩義
敦宛若俯仰間星紀甫一旬大雅竟湮沒微衷復誰
申上哭王家幹下哭義所親

題畫

霧區燁燁紫芝香碧嶺飛泉噴瀑長欲賦小山招隱
去秋風叢桂正芬芳

雪夜卽事

江臯雪夜明孤興殊未已空林颯颯無人行林杪一
聲清磬起遙依清磬問山僧倏看海月虛空生月臨
萬壑寂無影風度疎松微作聲始信空門了空色惟
餘片月窺禪室蘿幌春風任雪消心持半偈長虛白

靜會禪心有感

可憐世網與情塵欺盡悠悠今古人身計總成三點
誤心詮始信一空真閒看遠岫雲無礙靜愛虛窻月
自親謝監不須投白社在家還復了迷津

謝公雖不與蓮社嘗
云我已在家出家

卽事有感

野鶴棲林薄長蛇欲薦吞人情方叵測天道復難論

訝說滄桑變愁聽艸樹燔悠悠千古事曾問楚王孫
二

五月庭柯落焦禾未足方火山行處密赤阪坐看長
鸞鶴空縹緲蛟龍自伏藏何時渥霖雨任臥北窻涼

喜陰

四日東風急陰雲萬里生甘霖雖未霑旱魃已消精
衡岱氣應接江湖浪亦清定知高樹底欹枕聽嘉聲
喜雨

岳雲徐觸石江雨忽漫空此日焦原稼方霑造物功

秦皇膏火後漢帝湛恩中更喜陶家菊秋花又滿叢
新秋

河漢碧無翳悠然披素襟幽花分霽色古樹落秋陰
冲賞病中得流光靜裏侵生涯惟澗壑人世任浮沈
七夕詠牛女得機字

碧漢離情切黃昏仙馭飛纖霞偏委佩新月解親衣
自怨秋期渺誰教曙色輝去年今夜盡幾度泣殘機

二

此夕秋期屆年年此夕稀曠離腸自斷將匹淚重揮

桂月初開鏡天風乍引衣亦知仙路永遙望鵲梁飛
巧笑先投佩含情怯卷幃意長嫌夜促懽合恨朝違
無奈流澌動爭如夜色微傷心向清淺還對舊支磯

贈鄒彥吉觀兵茗雪

何論才調薄風騷千古英雄一羽毛謾訝詞鋒當劔
術豈知兵略有文殺南樓坐嘯澄湖月東海行消赤
岍濤敢謂孫郎驚宿將精銷白首在蓬蒿

壽金潛素七十 并序

先王懷握瑜瑾櫟素自殺拂志龍雲棲神豹霧道
貌天遊夷猶玩世一丘一壑自謂獨長西竺南華
竝推兼擅蓋拙於金馬而工於柱下者也以故歲
與天增道由人積壽界七十而尚鬢髮堅齒若少
壯然茲固非純白之效與我二三子相與觴之且
爲哥詩以頌其美於是絳縣疑年初輪甲子瑤池
竊果未熟三千先生之壽其未央云

志士甘細物幽人樂陶真所養在玄德萬事如浮雲
卓哉葆光子獨與恬素親白首戀泉石朱門厭囂紛
理精軒岐窟心解老釋津冲然世俗間被褐懷國珍

攜家入雲麓不異隱鹿門著書藏枕中一似鴻寶文
問我幾甲子請君推六身內照驗舍和踵息知凝神
乍御霞上觴笑期鶴背人霧椿有大年安識秋與春

古意

妾有千金鏡清光似秋月為惜長別離塵埃久湮沒
宿昔故心人託夢結殷勤贈我卷菴州宛似平生親
朝來引青鏡拂拭雕龍文紅顏倘未歇猶堪持贈君
詠落花
煙花散去各東西故入蕭娘錦字題金谷香銷空自

恨河陽嬌盡不勝悽傷君何處清塵路似妾從來濁
水泥誰妬春愁愁未劇更教枝上杜鵑啼

宋之問詩云昔日河陽縣氤氳香
氣多曹孃嬌態盡春樹不堪過

二

遮莫風光滿目賒芳辰底事忽生嗟誰經金屋留春
色空使胭脂泣露華寶馬香車
紫霧紅埃才昨日斷雲平楚即
天涯不知左相門前客幾箇還來問落花

三

老去傷春獨倚樓可憐蹊徑曲通幽才番水調催花

發又見花飛逐水流百歲光陰百歲客一迴春去一
迴愁五更風雨無情煞夜夜須當秉燭遊

宮怨

怨將團扇泣秋期誰道春風也自私年年長信花飛
日不似昭陽殿裏遲

夢莫大廷韓

三年未酌故人酒幾度憶君雙涕零昨夜故人入我
夢夢中契闊宛平生覺來孤枕忽相失清淚傷心秋
雨聲憶君五年前過我三徑中憐我家雖貧花猶笑
春風明日且嘲邑宰去子雲花徑惟蒿蓬似君繾綣
情若此能有幾人交道全嘗謂素心交白首慰衰老
人生苟相知豈必骨肉好寧知一別便長逝平生意
氣隨秋艸恨我貧病人一心常不達君病吾倉黃惕
息情內熱君沒吾長號癯瘦色如鐵雖有九迴腸竟
無一執手去年旣負王太常今年又負同袍友夢君
憶君情非一可歎貧交益悽惻從今細數從前交幾
許歡娛幾蕭瑟蕭瑟歡娛一夢中番訝夢中情愈密
旦夕扶病秋風高落葉寒雲哭膠漆

又夢黃山人淳甫

昨夢廷韓子朝來又夢君故人頻入夢荒徑泣秋雲
宿艸空山暮金蘭舊日分十年悲宋玉愁作大招文

題周公美艷情集後

予覽周郎公美艷情詩百篇心奇之夫艷情易耳
艷情而不失雅調難也今公美詩無情不艷情無
調不雅殆別引騷人之一支乎雖然公美之才使
於此中稍抑勸而與諷雖奴僕命騷可耳

百轉流鶯曲裏新絨情寫恨不勝春陸郎臉上朝雲

色錯認襄王暮雨人

二

細雨青山紅袖杯琵琶撲碎續絃催絃中不是蕭娘
誤要得周郎顧曲來

贈松陵馬虹臯

美人芳佩擷臯蘭千尺飛虹影碧瀾七十二峰明月
夜芙蓉長在鏡中看

二

莫說家貧擔石無鱸魚換酒不須沽何時落遍江臯

孫齊之松韻堂集
雪安道門前看五湖

林影

費盡黃金四壁縣子雲亭館落誰邊多情惟有庭槐
影猶伴松聲到榻前

秋日送大司寇王元美之留都不及敬和諸君

子關門之作

繚繞青山使節臨送君空滯碧江濤遙聞 聖主頻
憂旱共道祥刑解作霖推轂 兩朝今白髮酬恩八
座舊丹心獨憐鄉月懸秋漢偏向關門紫氣深

九月同徐茂吳張幼于顏別駕會李計曹登虎

丘得東字

偶懷元亮興遂與李膺同緩帶尋松徑開筵醉菊叢
冥搜片雲外長嘯五湖東偏有龍山會風流意不窮

詠水燈

裁君玉壺質鬪此蘭膏芳瑩迹能無影含虛解有光
月來疑合璧風至似搖瑤誰識凌寒操清輝溢艷陽
贈成霞樵

世路漫相與愛君多古心一椽自窮巷五柳惟疎陰

孫齊之松韻堂集
白眼交逾冷青囊秘獨深題詩忽相贈字字皆黃金
壽嚴太君

夫人初剪細霞裳書寄西王瑞應長紫閣自隨丞相
貴瑤池却借羽人觴連枝瓊樹月中種千歲霧萱洞
裏芳解道韋家經學舊漢皇行復錫高堂

夜雨中同幼于林吳諸君集朱鴻臚舟中觀妓
得雲字

綺筆徵詞客蘭橈載舞裙千山催暮雨一水駐朝雲
人影花中見鶯聲曲裏聞十年江漢別今日又逢君

瑞麥詩頌邑侯王公

維良經禹甸遍野樂堯天四月登初稼雙岐賦大田
稔先唐叔日穗比漢臣年總是 皇家瑞千秋太史
傳

又賦得太平曲

彈琴作宰穆清風嘉穀多岐庶草豐誰識祥雲與膏
雨總調單父七絃中

二

賢侯亮采肅天工南國何愁杼柚空已頌兩岐歸北

極還輸六穗告東封

三

明良共治樂無疆
白雉行看貢越裳
不是上天貽率
育來麩何自發禎祥

四

漫道嘉瓜生越邑
空聞連葉產齊宮
爭如瑞麥歌閭
巷能使周王頌屢豐

連葉芝也漢書云九莖連葉產于齊宮

五

和風協氣溢嘉生
聖帝垂旒在紫清
欲識太平還
有象只聽江左頌歌聲

為黃雄州作瑞麥詩

一去嶺南愁地僻
遠聞江左樂時和
明君賜詔祥
風數茂宰揚仁協
氣多已覩兩岐稱
瑞麥更看同穎
獻嘉禾三年亦忝
刀州夢安得漁陽
百姓歌

贈黃廣文

大雅復何在
美君能自持
素懷國士蘊
終遇聖明
知山斗韜真氣
雲霞屬藻思
不知門弟子
誰得馬融

奇

謝鄭司農見過

看君逸氣自英英
慢世長懷萬古情
不是仙郎愛招
隱孰知蓬跡浪
逃名簪裾半落煙
霞色
詩句渾涵金石聲
履處只今生
帶艸年年却憶鄭康成

春雨中湖上訪友

出門見芳艸
遙動相思情
欲待桃花發
其如春水生
雨中千嶂失
樹底五湖明
爲人幽溪路
浮鷗自不驚
春雪中訪張幼于曲水艸堂

不是山陰道
還從雪後來
到門高士臥
映戶瓊林開
碧掩徑中艸
花添竹下梅
却憐歌郢調
幽興獨相催
蚤春聞鄭明府諸公汎舟湖口却入花源遺以

短篇

欲尋洞庭路
却愛武陵春
花暗渾迷客
雲深始見人
擷芳同贈楚
違世異逃秦
誰道金門吏
清風卽子真
春夜同諸公青芝山詠梅得天字并贈鄭明府
越來溪畔艸
芊芊庾嶺風
光乍眼前
千澗影寒山
挂月五湖香
動水連天
林疑姑射枝
枝雪花似瑤臺夜

夜妍解道江南春色早仙郎一曲爲誰傳

刻孫齊之先生松韻堂集

